

入高柳夕陽中老子於此興復不淺有曰風雨泊舟
者雖靈晦霽霽而不作陽侯怒舩底足濁醪便不妨
倚枕聽敲蓬滴瀝有曰採蓮圖者殆若耶溪蓮女耶
獨不能貌笑隔荷花共人語耳有曰柳陰放棹者意
甚佳而小恨剥落有曰劉阮天台者大類前金谷而
自然勝之天台石梁今漸坦迤可涉而求欲界仙都
一尺地不得矣劉阮事當不誣其謂半歲而當人間
數世不敢以爲然也有曰高閣燕息者麗敞靜好而
不作五侯炎色其晉公午橋白傳履道甲乙耶署名
不能雅或休承別有據聊因之右爲幀凡二十有七